



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
11 Novembru 2024

JSMP apresenta no diskuti opsaun pena ne'ebé relevante ba kazu violénsia doméstika ho autór judisiáriu sira iha Tribunál RAEOA

Iha 07 Novembru 2024, JSMP apresenta no diskuti opsaun pena ne'ebé relevante ba kazu violénsia doméstika ho autór judisiáriu Tribunál RAEOA. Diskusaun ne'e ho tema **“Konsolidasaun Esforsu atu Prevene Violénsia Bazeia ba Jéneru liuhosi desizaun judisiál”**, ne'ebé envolve Juis, Prokuradór no defensor públiku, advogadu privadu, representante MSSJ, Adjuntu Komandante PNTL RAEOA no parseiru sira hanesan ALFeLa, Pradet, FEEO, dosente no estudante sira hosi fakuldade direitu UNPAZ Ramu Oekusi.

Atividade ne'e realiza ho objetivu atu apresenta rezultadu monitorizasaun JSMP iha tribunál judisiál sira kona-ba kazu violénsia bazeia ba jéneru no survei nivel satisfasaun públiku relasiona ho funksionamentu setór justisa nian.

Mekanizmu ne'e dezeña atu hetan komentáriu no apresiasaun direta hosi juis sira iha juridisaun referidu. Alende ne'e, JSMP mós apresenta iniciativa no esforsu sira kona-ba politika kriminál ba alterasaun Kódigu Penál (KP) no Lei Kontra Violénsia Doméstika (LKVD) atu inkorpora kazu inestru nu'udar krime ho artigu spesifiku iha KP no krime relevante seluk iha LKVD.

“JSMP tenta ho meu hotu ne'ebé posivel atu komunika faktu auténtiku sira ne'ebé rekolla liuhosi atividade monitorizasaun no survei sira ne'ebé refléta realidade kona-ba setór justisa ninia funksionamentu ho intensaun atu fasilita autór judisiáriu sira hola medida penál nesesáriu no própriu liuhosi desizaun judisiál no dezenvolve estratejia instituisiónal relevante sira hodi responde realidade hirak-ne'e”, dehan Sr. Casimiro dos Santos, Diretór Ezekutivu interinu JSMP.

Durante diskusaun, JSMP apresenta dadus estatística kazu ne'ebé JSMP rekolla no pena ka sentensa ne'ebé tribunál abitua aplika ba kazu violénsia doméstika sira durante ne'e. JSMP rejista katak durante tinan tolu ikus (2021-2023), tribunál kontinua ho tendénsia sira hanesan iha tinan 5-10 ba kotuk katak tribunál sira esesivamente aplika suspensaun ba pena prizaun nia ezekusaun iha maioria kazu krime sira violénsia doméstika, tuir-fali pena multa, hafoin pena admoestasaun, pena prizaun ho persentajem ki'ik. Enkuantu modalidade pena serbisu afavor ba comunidade auzente ka dezaparese (lakon) tiha iha prátika desizaun tribunál nian. JSMP avalia katak mezmu tribunál konsistentemente aplika suspensaun ba pena prizaun nia ezekusaun iha maioria kazu sira violénsia doméstika, maibé pena ne'e la iha

kbiit atu prodús “efeitu-hata’uk” no prevensaun jerál iha sosiedade nu’udar finalidade hosi pena ne’ebé Kódigu Penál estabelese.

Bazeia faktu real hirak ne’e, no depois avalia no ezamina modalidade pena sira tuir Kódigu Penál, JSMP rekomenda ba tribunál atu explora pena traballu afavór ba comunidade nu’udar pena alternativa atu substitui pena suspensaun no pena multa.

JSMP fiar katak pena traballu afavór ba comunidade, alende refleta prinsípiu sira no preferénsia Kódigu Penál kona-ba pena la’ós privativa ba liberdade, pena ne’e mós aliña ho konseitu no filosofia sansaun ho perspetiva pedagójika, atu eduka no kurize arguidu no comunidade hodi la repete krime hanesan iha futuro. Maibé se tribunál mantein ninia pozisaun no preferénsia atu aplika suspensaun ba pena prizaun nia ezekusaun, JSMP rekomenda atu tribunál asegura atu introdús suspensaun pena prizaun ne’e hamutuk ho devér ka suspensaun ho regra ba konduta tuir artigu 69 no 70 Kódigu Penál.

Juis Administradór Tribunál Judisiál Primeira Instánsia Oekusi, Dr. Evangelino Belo apresia inisiativa JSMP hodi organiza fórum ka diálogu ne’e. Juis sira haktuir katak ho esforsu sira ne’e mak ikus mai comunidade hahú kumpriende ona katak violénsia doméstika ne’e la’ós bikan ho kanuru mak tarutu, maibé violénsia doméstika hanesan krime públiku nune’e ema se de’it mak hatene kona-ba akontesimentu ne’e bele hato’o denúnsia. Juis sira hatutan tan katak deskobrimentu sira ne’e sai hanesan referénsia ba tribunál hodi hadi’a di’ak liután tribunál-ninia serbisu.

Relasiona ho pena traballu afavór ba comunidade, juis sira argumenta katak durante ne’e sira hanoin hela kona-ba modalidade ida-ne’e, maibé presiza lejislasaun komplementár atu asegura mekanizmu supervizaun no kontrolu durante implementasaun. Tanba durante ne’e, mekanizmu hirak ne’e la disponível, nune’e juis sira iha difikuldade atu implementa. Juis sira hatutan katak bainhira sira atu deside kazu ruma sira sei avalia no tetu sirkunstánsia relevante sira hotu atu asegura katak desizaun hirak ne’e, projeita ba protesaun bens jurídiku sosiedade nian; reintegrasaun ajente ba sosiedade, no asegura justisa ba vítima ka ofendida sira. Mezmu nune’e, tribunál tenke asegura katak pena la bele ultra pasa medida ba kulpa.

Entretantu, sira rekoñese faktu sira hosi survei nível satisfasaun públiku relasiona ho adiamentu prosesu ba tempu naruk no konsiente katak tribunál presiza halo duni melloramentu ba kestaun hirak ne’e. Ba kestaun esforsu sira relasiona ho politika kriminál ba alterasaun Kódigu Penál, Juis sira konkorda atu bele iha provizaun espesífiku ba kazu inestu tanba Kódigu Penál seidak asegura protesaun adekuada ba krime ne’e, bainhira ofendida antize ona idade adultu.

Iha parte seluk, partisipante sira seluk mós apresia inisiativa ne’e, tanba permite espasu atu halo interasaun direta ho autór judisiáriu sira. Partikularmente Adjuntu Komandante Polisiá Nasional RAEOA, apresenta

preokupasaun sira relasiona ho koordinasaun no ordem hosi Ministériu Públiku tenke klaru atu la prejudika prosesu detensaun prazu 72 oras iha nivel polisia.

Diskusaun ne'e realiza ho forma ida informál iha ambiente ida amigável no permite interasaun ativu entre autór judisiáriu no partisipante sira no atividade ne'e realiza ho apoiu hosi TAF – Nabilan.

Atu hetan informasaun kompletu favor kontaktu:

Casimiro dos Santos
Diretór Ezekutivu Interinu JSMP
Diresaun e-mail: casimiro@jsmp.tl
Telefone: (+670) 33238883 | 77257466
Website: <https://jsmp.tl>
info@jsmp.tl